

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY


01

MAY 11 1951

T-5413/7258

東田集

一



兩公叢集合編

馬東田紙沙溪

馬東田孫沙溪

兩公遺集合編

序

予家甘陵據滹沱之下游居燕趙之要衝人文間出

慕義強仁之士蔚為英華發為悲歌往往而有邃古

之初開先文獻者為吾邑之澹臺子書傳所載不過

行不由徑非公不至云爾著述不槩見焉意孔門高

弟弟以其實無事於文乎後之學為聖賢者文固不

可少也傳數百年秦滅漢興以賢良策士時廣川董

子獻天人三策著春秋繁露壘壘數十萬言去古不

遠猶有聖賢遺意焉惜其不能大用竟以災異直言

被讒下獄良可歎也厥後繼起張子並邢子昂子才



顯於任丘王叔治吳季重石仲容著於南皮高伯恭
爲貞信直史封隆之稱博大長者高季輔之金鏡清
鑿皆廣川傑也先後輝映時異地同猶接踵耳至以
聲律詩賦著爲有韻之文滄州高達夫河間劉長卿
交河張承吉均能舛蠻三唐而繩武南皮者也彼諸
賢者或以文章或以風雅各成一家言詩書所載如
或見之流風餘韻其不寂寞乎後來作者獨寥寥焉
何也夫十室之邑必有忠信守不少澹臺而澹臺傳
學不少江都而江都傳藝文詞賦宜不少遜於諸賢
而諸賢傳容或有不傳者非古人之過稽古者之過

也予爲是懼嘗考邑乘所載詢於故老所聞得吾鄉
先達大中丞東田馬公罔卿沙溪孫公兩集於斷簡
殘編下晝焉誦之夜焉思之旁而揆之闕而補之校
錄而次序之珍諸篋笥將以壽世艱於工費有待也
旣宦粵東由瓊而廣往來舟車手不釋卷惟二公之
不朽是圖今冬奉

命視蹉權於嶺南駐節仙城客有以剗劂請者曰不可
使二公心血復泯沒於斷簡殘編遂不量力授之梓
人說者疑其未盡懼全文之或畧也請以古人解之
澹臺遺事不多見於經傳偃於武城得之夫子以貌

失之伐蛟其細行耳所存止此其爲不全者多矣董子敏於下帷拙於窺園勇於上書怯於迎合著述未經秦火當不止此又豈以是爲全畧哉他若諸公之文之詩又不必計其全與畧也二公生逢明盛尼於權閹雖處有爲之時率不能大行其志大肆其言以昌明其學竟殞軀於囹圄或賁志於林泉讀其書想見其人如日星河岳於爍古今充塞宇宙燦乎其不可掩也又安往而不得其全哉後之開卷者嘗鼎烹之一鬻窺管中之一斑二公之精神性命躍躍乎文字之外呼之或起余之爲是刻也直古人糟粕耳又

何斷簡殘編之足云

肯

康熙四十六年丁亥仲冬同里後學賈棠題于羊城
齋署之退思堂



東田集目錄

卷之一

章疏

修人事以回天變封事

退小人以安天下封事

糾劾宦官尚銘封事

糾劾宦官黨惡封事

陳言消變封事

陳言封事

代李伯起言時政



東日集
目錄
代李伯起陳便宜六事

乞休疏

起大臣以禪治道封事

乞恩養病疏

辭遼東巡撫疏

抵遼東謝疏

辭兵部侍郎疏

辭陞陟右都御史疏

辭左都御史疏

謝恩疏

鳴冤疏

卷之二

序

贈養浩毛先生教授杭州府學序

送張弘仁尹郊縣序

送吳天洪歸餘姚祭掃序

送何允恭分教濬縣序

贈張用和尹襄陵序

贈王義官序

送張養直省親詩卷序

贈李倅府序

送進士王良玉尹吉水序

送武君希賢守信陽序

送徐志良歸省毘陵序

楊典史初考序

贈進士林德溫教授四明序

贈陳判簿序

送聰僧官序

望雲軒序

贈張司訓序

贈陳司訓序

送左憲副序

贈李明府汝弼序

贈張巡司序

送翁判簿考績序

送醫官張伯華歸江浦序

贈吉安張太守序

贈李少叅序

贈張倅府序

贈徐推府序

贈劉明府序

贈景州胡太守序

送都憲左公巡撫山西序

送蓮幕杜君致仕序

榮慶堂詩後序

送姜上舍序

贈張天秩驛宰還代州序

平原別意圖序

賀封刑部員外郎楊公序

贈湯紀善序

全命錄序

贈婁方伯序

賀鄭氏翁母同壽序

強太恭人袁氏輓詩序

壽阮太夫人序

賀韓隱君八十一壽序

贈河間守陳侯希白考績序

贈張二尹序

贈都憲劉公節鎮遼東序

送徐封君還武邑序

雲牕詩集後序

贈大叅楊侯宗德進秩序

卷之三

書簡

簡少傅馬公負圖

簡暹長老

簡謝木齋閣老

簡劉大司馬時雍

簡陳元溥

簡孫勳部誠甫

簡李伯起同年

簡李汝弼侍御二首

答周總兵書

簡何大理仲衡同年

簡朱朝用方伯同年

示師言

卷之四

碑志

河間府學宮樂器碑記

德庠歲貢題名碑記

重修蓀侯周亞夫神祠碑記

顧氏墓祀碑記

重建時恩寺碑記

故城縣重建廟學碑記

復宣府祀田牧場石記

增修廣寧馬市碑記

廣寧馬神廟碑記

右通政韓公生祠碑記

棗強縣知縣徐君生祠碑記

亡友封承德郎吏部主事孫公玉之墓表

中憲大夫湖州府知府從兄馬公墓誌銘

中順大夫廣東廉州府知府戈君墓誌銘

卷之五

雜著

一閒軒賦

出關圖賦

八駿圖辯

中山狼傳

泰僧會傳

大旱禱雨文

祈雪文

里婦寓言

桑中解

歸來歌

陳鑑字良式說

沐恩堂記

崇穀堆記

講武圖記

退思軒記

寅菴記

書策學輯畧後

書永感堂卷後

書林克冲奉使暹羅卷後

書左尚遠哀辭卷後

書興隆八景詩卷後

祭劉大尹文

祭西田呂太守文

遙祭濟南大冢宰尹老先生文

將赴遼東告辭素菴府君墓文

卷之六

東日集
目錄
七
五言古

送錢世恒赴廣南料理邊儲

社飲

擬古八首

田家

擬古

酌客

宗康年幾古稀風情未衰股臂間忽感風疾數日

稍愈命妓酌酒如故詩以警之

大用屢載酒西園次韻奉答

過扁鵲廟

謁獄神

夜坐聞雨

卷之七

七言古

引子升天魚圖爲玉之孫吏部題

鍾馗圖

後猊圖

和胡工部見贈韻

春詞

除夕分韻得未字

百禽雙鳳圖為宋黃門廷用賦

郵亭琵琶圖

白豹突馬

黑豹突馬

壽白司寇

耕

織

長門行

李將軍射獵圖

卷之八

五言律

馱軒

送王舉人下第歸湖湘

送吳進士珍父歸吳中

送謝上舍歸浙西

遊西山古剎

黃驛丞懷歸理荒二首

夏日睡起即事

冬夜小敘

歎衰

幽居

長安雪

寒夜自述再和舊韻

再贈范洪曹

冬夜偶書

次周都尉韻

送冀文華郎中弟文緒偕其姪還淮南

題漁舟便面

送定師歸淮南

石渠阻雨

填北馬房

北高馬房

過洪法寺次韻

送客過法林寺

發昌平道中遇雨

遊白雲觀

卽事

春雪

與客遊東園限韻

自理隙地植花

發安塞

再宿聶石谷郵舍

再過鄜州

宜川道中

山城驛次壁間鄧繼申韻

高橋題河西道壁

次李西涯韻簡屠元勳

春社

柴溝堡

春晚三首

雨後

田間自述

留客

東塲早秋二首

西菴

短述

便面小景

夏日園亭卽事

得雨

貽朱國用

東莊縱步

寄朱朝用同年

同錢大用早秋遊西園

和梁家莊驛壁間韻

登閭山有感

江口短述

逆旅述懷

示廣寧吳州判

書扇贈徐正郎

秋懷

邊城秋夜

臥病

秋熱

張大尹載酒

八月九日雨徹夜不止

苦雨

寄贈寧州判

卷之九

七言律

送王生南歸

東西寧侯病中

輓邢亞卿

送畢秀才還安東

送尹之訓門生下第

憶東郭別墅

思田中春日

思門前流水

逃亡屋

送人仕江南

張監生望雲思親圖

輓黃文選乃翁

泮鄰書屋

溪南別墅用韓掌科韻

送畢司訓

偶成

題東海張處士慕親草堂

送上舍歸省和韻

遊西山

和彭載道

和張用和

和吳艾夫

和童勉和

和葉伯昌

向行人使楚歸便壽其親

送章德懋致仕二首

梅雪軒

回次井陘與西寧異途雨後有作

送張行人使占城

和靜之引鏡漫成韻

送李二尹

早春省中試筆

莫春寫懷和貫道韻

又和貫道

首夏卽事二首

省中卽事二首

寄贈泰僧官退休以得譴部使者

文卿招飲同年陳思敬在坐以入直不赴二君青

州人陳時爲高陽令

自題蒲扇

內帑受幣過海子橋觀荷花用蕭寅長文明所限

四韻

苦雨

是日晚晴再作

八月十六日書懷

送別和子美韻

和貫道雨中

早春省中試筆

寄文天爵

贈徐處士

送高元健依親

午日示李汝弼

城唐書屋

過慈恩寺

述懷

病酒

登釣臺

送萬閣老兄還蜀

靈籟亭

擬去婦

秋懷

齋宿大興隆寺

慶成宴王世賞編修和李德馨寅長

宮怨

飲王太史第時李德馨諸公聯句畢復限韻

近寺訪友人坐間限韻

王太史諸公見過寒舍小酌限韻二首

觀王太史書東坡圓澤傳限韻題劉振之手卷

飲李寅長第限韻

和劉振之感懷

山行限韻三首

過廣善寺

過昭應宮

天寧寺和韻

題崔鍊師壁

奉答李公夏日喜友見訪之作限韻

和韻題錢世恒侍御卷中

楊友山隱君鄉飲

夏日病中卽事

和劉振之雨中感懷

東日集 目錄
再和夏日病中卽事

壽閣老商先生

奉答王宣溪見贈

和宣溪秋夜雨中感懷

和子美秋日出郭晚歸

秋日出郭限韻二首

壽王宣溪

劉振之和其韻

代諸同寅送林克冲使暹羅

飲薛經府別圃和韻

用韻贈德馨

德馨宅卽席限韻道別

王太史過寒舍小酌卽席限韻奉答

陳千戶莊上卽席限韻二首

朝天宮訪李鍊師不遇

和振之遷居次儲中舍韻

王太史遺帶詩以謝之

秋夜不寐感而有作

慈恩寺登高用杜韻

次韻王太史登慈恩寺閣

重陽後數日王存節鴻臚宅賞菊卽席限韻

朝天宮訪真秀才

過黃翁家留飲用唐韻

和韻慰郭子美下第是年予校文春闈

送蘇鍊師還山

述懷和敖靜之韻

四月八日陪王世賞編修郊行限韻

和董子仁郊行飲王家莊上

輓陳民部繼母方孺人

郊行飲王家莊上再和前韻

省中和李汝弼韻

書懷

送孟鎰千戶侯漕運還家用郭子美韻

言懷用東坡次韶守狄大夫見贈韻

住俸

開守彭載道以名酒新鷺見遺詩以答之時彭久

病

過舊大名城

再過舊城

歲莫

卷之十

七言律

感懷次郭子美韻

次敖靜之九日言懷韻

西涯侍講圭峰宣溪二太史夜飲寒舍有作次韻

奉答

清虛觀次王太史韻

有感二首

西掖晚歸有感時事聊賦述短章用呈同志者

和宣溪述懷

和陳粹之僉憲借居韻

過廣恩寺有憶用長老

天寧寺次韻

立春後禁直

挽鄧廷曜編修父

除夕次韻

和吳掌科新正述懷

人日次劉振之韻

齋宿大興隆寺懷圭峰侍讀景范司封各一首

十六日聚飲照上人房二首

東坡集 目錄 卷一
挽王都堂朝遠

花朝後十二日山遊限韻二首

三月十一日過城西劉氏莊居有作限韻

十四日遊甕山次謝于喬太史韻二首

是日次李西涯一首

寄李大尹因時上舍附上

寄呂都憲天章

寄郭漣

送周仁廣通判

遊潭柘山龍泉寺限韻

王太史園亭同明仲洗馬圭峰侍讀西涯侍講曰

川修撰正夫提學小飲

次夏憲副留別韻

夏日訪李鍊師

壽宗勉馬司封

秋懷和振之病中韻

重陽前四日

十月十七日巡視京東馬房迄歸通州道中

泮石橋公館題壁用前韻

官莊道中

登孤山書寶峰寺

壽董都督

送孫約之僉憲致仕

湯山馬房

穀日題艾鍊師壁次韻

花朝前一日過真空寺

清明謁陵出北關

次清河

次沙河

過通濟橋東同事者

與昌平館人話舊二首

登昌平道中遇雨

和齋房聯句韻

再過館人題壁

歸途和汪文潔韻

沙河道中

贈鄒訓科

靈惠寺訪亮上人二首用韻

遊房公城西別業

題共先塋次韻

紅梅

宣溪宅會飲限韻

夏日過長慶寺次程諭德韻

禁直寓懷

和楊文卿近寺假榻

夏日飲李公宅次韻二首

和楊重光韻兼柬照一天上人

次文卿侍用重光聯句韻

新春二首

人日

春日同宗遠措大高峰上人遊東園限韻有作

次西田述懷韻

春曉野望

中年少睡長夜感懷

誌夢進退韻

過塔院尋泰上人偶作

登縣城南樓

春遊東園

官堤春行

東園次前韻

東日集
春夜同泰上人話舊有作兼東坐中諸君子
同泰上人縱步東園偶作

春夢

暮春遊東園

夢中誌所見

至京師呈舊遊諸君子

謝畢司封惠紙筆

清明

挽錢塘范處士

良鄉

涿州

新城

白溝

河間

獻縣

望家

東園避暑

湖州宅同李汝弼賞蓮

赴延綏

雨臥書臬司壁

入宜君界

望中部

宿三川

曉發甘泉

暮投園林驛

順寧道中

再發安塞

夜宿聶石峪舖

書安定分司壁

靖邊營分司

寧塞營

把都河堡

新安邊營

柳樹澗廢城和壁間王威寧韻

龍州城

威武堡

龍州邊外

平敵堡

秋日榆林道中

延安分司題壁

鄜州

宜君道中

同官偶成次前韻

耀州

三原

奉送韓公都憲出鎮寧夏

華清宮

卷之十一

七言律

宜君道中

破屋

洛川喜晴

鄜州

再過無定河

宿米脂

宿榆林堡次壁間曹大理韻

神木縣分司題壁

永興堡題壁

府谷縣

題壁

水寨

孤山堡

神木堡

葭州

延長野寺牡丹

宿雲鋪有感

曉發雲岩

經廢武帝廟

二月二十四日富平道中見花

臨潼

再過新豐

灞橋春晚

鄠縣

重陽宮次白司馬韻

盩厔

郿縣

連雲棧東河橋驛

吳山

鳳翔書懷

茂陵

涵碧池

賦太乙真人蓮葉舟應教

賦得荷葉露應教

送張希載侍御入京

岐山行臺偶書

苦竹

隴州道中兼柬閔光甫大叅

和閔光甫韻

華亭道中喜晴

過乾陵

晚渡咸陽

次韻題光甫草堂

途間喜晴

送馬宗勉太常還吳中

春日東軒小酌聯句

李國英莊上待遊山同伴

送馬太常在告

二月一日風惡

居庸關

黃花鎮會屠元勳都憲和其韻

沙嶺道中即事

白瀑寺

德勝寺

紫荆關

浮圖峪

廣昌道中

倒馬關

阜平縣

軍城鎮

龍華道中

書行臺壁

帥府東圃

輓賈僉憲母趙孺人

春寒夜坐

別上谷

觀稼

灌園

憩樹

嘲田濟民

遊鄰寺憶泰高峰上人

簡景守馬世維

舊居

送王縣博謫山陰河泊因便道長沙省其親

雪

新春試筆

雨中自述

再用前韻

閨怨

卽事

六月望新舍成與呂太守韓明府會飲

秋雨病中

臥病苦雨

謝黃侍御

十日自述

宮怨

病述

早春自述三首

閒述

自咎

溪上卽事言懷

東日集
目錄
花朝會飲

讀騷有感

索居

築墻

贈樊都尉

連日風寒遊賞盡廢有作

村飲

自述

鄉會四首

柳逕

杏塢

槐庭

豆田

麥壠

溪雨一月不止

自述

秋日期宗康不至

秋睡

自遣

言懷

寄顧良弼院長

寄王明仲大理

久雨屋漏書卷盡濕

西園對客自述

與元健宗康放船小酌晚至東莊步歸

秋雨柬社中諸友

東莊言懷

秋晚登樓

遊西菴

秋日同希仁元健宗康飲西菴有作

久雨西齋

聞遠寺有竹遣人賫百錢求之至則惟石竹數叢而已蓋北人初不識竹見者謬認以告予也一

笑有作

北村

黃士華載酒西菴邀予賞菊遇雨

九日

臥病苦雨

聽雨

卷之十二

東日集
目錄
七言律

秋日西園

對雪

賦雪

偶述

自述

春述

春日郊行

村行用韻

小園春集

落花

腰疾

夜雨不寐有作

東莊

九日對菊述懷

獨笑亭

草亭書懷

春懷

田園秋興

喜客載酒放船飲半里橋

東日集
目錄
半里橋

抱甕亭

重陽會客有活魚鮮蟹之饌

同宗康士華西壕泛舟

卽事用柳韻

放舟述懷

訪西菴有懷舊僧

秋日西菴示國用

獨酌有述

春日與客泛舟

獨酌

東莊二首

夏雨

索居中無可與交者惟朱李兩生一工繪事一精醫術時時過從談笑而已人或見誚詩以解嘲
東劉大司馬兼謝其推薦

中秋無月

村莊秋熱

秋懷

奉和錢大用見贈之作

自遣

偶述

折枝梅花

硯

琴

贈魯錦衣景章同程侍御見過

早春半里橋散步

西園

書懷

新建北樓

獨笑亭小憩

與客登城晚眺時譙樓已圯城中惟甘陵舊址護
國古刹存焉感而賦此

看竹

成趣園與李醫小酌

病述

秋夜與客舟中話舊口占

西園卽事

躡者

矇者

禿者

儂者

瞶者

瘖者

病懷

夜宿薊州

遼陽雜述

貽朱太監口號

次榆關驛

宿蘆峰驛

山驛阻雨

玉田道中

夏店道中村莊

貽寶通寺恩長老

十月兵部中見菊

改南京工侍

過雄縣

春晚西園卽事兼憶舊遊

早春至自京師再遊半里橋別諸親舊

登樓憶黃士華

東日集
目錄
西壕寓目

清明舟中

張秋偶述

泊南旺湖連日阻風

南旺遣懷

過分水祠

舟中聞哭

濟州感懷

魯橋道中

途中次任相之太守韻三首

過徐州次相之韻

贈答任太守用其韻

晚泊孤村風雨驟至

次韻別任太守

南都官舍寓懷六首

賜歸

秋日歸田

車過蘆溝橋望京師漸近

獄中自述

示黃少卿

自述

重有感

邊懷用柳韻

感寓

雪中飲酒

客夜

代冒同年和毛總戎韻

和毛總戎遊鑿閭山亭之作

別劉都憲

五月二十四日下通州

後歸田

對菊

和周耆老韻

卷之十三

五言排律

挽陳公佩父客死於秦時爲茂宰致仕

挽蒙陰李少叅

王太史席上限二十韻

卷之十四

五言絕句

張醫師牡丹卷

題攜琴訪友便面

題山水便面

宿洪法寺

題童勉和便面

絕句二首

捕魚二圖

題斗方鶴鶉飛鳴宿食

秋江獨釣便面寄陳元溥

漁舟晚泊便面寄周載文侍御

菊二短句

柳樹

大道

城市

臨行題寓舍壁

積雨忽晴

卷之十五

七言絕句

明妃二絕

午日

李賓之題陸先生小畫海榴書屋

和王彥平賞牡丹韻

再和

題錢世恒壁間畫竹用王太史韻

飲劉振之寓次用錢世恒韻

屠元勳秋官以畫梅贈張廷芳憲副求詩其上次

李西涯韻答之時張赴浙臬

題沙河寺

寒夜

題莊僉憲章江賦別卷用王太史韻

題冀文華郎中墨牡丹卷

題王彥明秀才畫中梅花

題戴文進送別圖

宿南石渠公館題壁

碑刻月梅

三笑圖

乘槎圖

題畫雪景

題漁樵小畫

春日敬陪秦王郊行限韻四絕

高陵

題壁二絕句

武功行臺寓留一飯卽赴扶風

書華亭分司聽壁一絕

題扇面小景

題便面小景

促陳元溥水雲亭之遊

題小畫

圮橋進履

短述九絕

夜半聞雨時久旱二麥未登

江村釣舟便面

東塲

東莊

琴

書

畫

絕句

園丁送黃菊

約西田賞菊以病不至折枝贈之

逢小沙彌問訊日華上人

村居絕句

二絕句

口號

白蓮

朱槿

芙蓉

夜合

斑竹

芭蕉

薏苡

芍藥

春怨

題扇面秋江蘆雁漁舟吹笛

四時詞

偶成二絕句

家園見梅

臨清舟中別李醫

夢李汝弼

登堤

傳舍

蝴蝶

折枝紙梅

畫屏紅梅花

東田集卷之一

甘陵馬中錫東田甫著



棠青南

男際熙庶咸

同里後學賈

枚功菴編定

男炳鷺洲較訂

樸素菴

男念祖聿滋

章疏

○修人事以回天變封事

頃者言事之臣多以忤旨被黜遂使諫垣之臣亦以隱默
自容他人不言猶有可諉臣言官也以言為職乃不敢言
所職何事下負所學上負朝廷明則人非幽則鬼責蚤夜

興思毛髮森豎茲者新正甲夜星變有聲荷聖度之優容
許臣等以論列詳盡于國家生民之利病無懷于干冒顧
忌之私憂此卽帝堯詢及芻蕘大舜舍己從人成湯從諫
弗拂之盛心也臣等聞之懽呼踴躍如釋囚繫十數年抑
鬱之懷乃今幸得一吐死且無憾而况許臣以不死乎方
今敝政如破屋然牀牀皆漏如痘嬰然歷歷皆瘡未暇毛
舉以溷聖聰姑舉目前以奉德意其最大且急者曰近倖
干紀也曰大臣不職也曰爵賞太濫也曰工役過煩也曰
進獻無厭也曰流亡未復也凡今所以上厯九重之憂曾
莫出于數事之外國政斯蠹元氣載虧天變由是而招生
計以之而蹙伏望皇上俯聽臣言無應故事天變不消臣
等甘受礎鎖蓋近倖之設國初有定制今之近倖一何盛
歟或一監設太監一二十員或一事參內官五六七輩或
分布藩郡享王者之奉或總鎮邊疆專大將之權或依憑
左右以援引儉邪或交通中外以投獻奇巧司一錢穀則
法外取財而兵民坐困貢一方物則刑以求賂而官吏被
殃殺人者得見原而不死敗事者得請託而逃刑邇年以
來如汪直梁方韋興陳喜輩不可枚舉往往繕寫經典布
滿寺觀進奉金玉遍索閭閻內耗府庫之財外奪軍民之
利所以招天變虧聖德者未不由此輩也城狐社鼠未

易剪除兔窟隼墉自爲得計惟皇上斷自宸衷訪參國論
痛加裁抑無干紀綱司錢穀者革去在鎮守者取回遠闔
寺刀鋸之餘復門戶掃除之役則近倖少戢而天變可回
矣大臣者天子所與佐理天下者也今之大臣一何鄙歟
其未進也非夤緣一內臣則不可其既進也非依憑一內
臣則不安此以財買官彼以官易財是以在位之人率皆
俛首臺閣無所建白府部奉行文書蓋將爲柔蘿附木之
不遑豈復有砥柱中流之可仗是無怪其百計苞苴而轉
輸權貴二天仰戴而官及弟男也夫京師者四方之則大
臣者百僚之長居京師爲大臣如此則藩臬郡邑誰不遞
倣效尤漁獵民財假大臣以圖進取乎是猶江河附滄海
而溝澮又得以附江河虬龍食魚鼈而魚鼈又得以食鰕
蟹其弊可勝道哉如戶部尚書兵部尚書禮部侍郎刑部
侍郎南京禮部尚書工部侍郎俱老懦無爲刑部尚書大
理寺卿南京刑部尚書禮部侍郎太僕寺卿俱清論不愜
所以招天變虧聖治者未不由此輩也軒鶴晉鼠任意
餐饗蹲鳳噤烏何所畏憚惟皇上獨奮乾剛大彰天討將
臣等所指實者放歸田里所遺漏者許令自陳別選剛正
不阿之士以充任使則大臣知警而天意可回矣爵所以
旌有德賞所以待有功蓋人主馭天下之具也今之爵賞

濫亦甚矣或無故而爵一庸流秩超崇品或無功而賞一貴倖貨直萬金雨雪天本自降也而祈禱者得以規美官金寶國所不急也而進奉者得以射厚利方士則以煉氣服丹之術惑天聽伶人則以魚龍角觝之戲褻天威以致數年以來吏胥工徒皆叨官祿俳優聃竺或玷班資彼所進奉不過價直百金或五百金至千金者少矣此之俸給或支末品或支優品至極品者亦間有之計其一年所償已數倍矣况其年數未可量乎臣等甚爲朝廷惜此妄費也且一歲傳奉或至千人數歲中則數千人矣數千人之祿其大者歲或千石其小者亦不下數十百石數歲則不

勝計矣是皆國家之餼廩百姓之賦稅也可以養賢德可以活饑民乃今棄之以資冗食之徒是誠可惜也已况賣官鬻爵斜封墨敕皆非前代美政皇上豈宜踵而行之又其間方士道流如左通政等官李孜省鄧常恩輩尤爲可惡每祈禱雨雪未效則詈天訶地詛日咒雷無所不至偶會雨雪自降則竊天之澤以爲己功此又招天變之甚者也臣等願皇上克謹上天之戒毋受小人之欺乞敕該部各查近年以來傳奉大小官員文官不由銓選武職不由軍功者通行革去民發當差軍勒歸伍匠著原役官還本職則爵賞不濫而天意可回矣臣等又聞閔損譏改長府

東日集 卷一
漢文惜作露臺蓋不欲以不急之工役耗閭閻之生計也
今之工役煩亦甚矣都城諸刹迄無寧功京營諸軍不遺
餘力琳宮甫及鳩材祗園又復相地遂令土木衣被錦繡
緇黃坐享膏粱國之所費蓋不貲矣就中如國師繼曉假
術濟私所費特甚尤爲中外所切齒也臣等嘗謂移此寺
觀土木之所費與彼僧道衣食之所資以救分陝諸郡饑
民其所活豈減富弼青州之數乎矧此軍士皆所以備有
警而衛京師者養之使銳氣百倍猶恐有不堪用今乃役
之使僅延殘喘緩急用之豈不誤事此尤有國者所宜軫
念也願皇上斷自一心無惑羣議內惜資財外恤人力將

此不急之營作可已者已之不可已者亦暫且停止以待
豐年徐議其宜仍乞借此財費發被災郡邑賑貸流亡則
工役不煩而天意可回矣近年以來規利之徒率假進奉
以耗國財或錄一方書或覓一玩器或購一畫圖或造一
簪珥所費不多獲利十倍臣等嘗求其所謂方書不過民
間醫卜輩欺世取財之書而點竄首尾改易名目所謂玩
器所謂畫圖所謂簪珥之屬不過民間之所有者耳高其
價直倍蓰千萬以自珍奇以誑耳目臣等願皇上洞燭此
弊屏而勿庸留府庫之財爲軍國之需則進獻息而天意
可回矣近年以來陝西河南山西地方雨澤愆期赤地千

里井邑空虛屍骸枕藉雖大兵後不若是之慘也皇上深居九重既不獲目覩其事羣臣具員百司又不能疏舉其詳是以流亡日甚惠政未敷灑淚籲天怨聲滿路假使一旦盜起不虞敵伺有間踐不毛之地入無人之境而我欲守無食欲戰無兵豈不大厯宵旰之慮乎願皇上體仁愛之心憫生民之荼毒將逝年所賞貴倖鹽課禁其關支仍召商中納以資被災之處將卽今所辦造寺銀兩暫且假借仍遣官賫送以活困饑之民則流民復而天意可回矣然此特弊端之大且急者猥承聖諭附進瞽言惟皇上采而行之庶幾少有補于國家生民之萬一若夫講求至治以圖太平則罄竭愚衷尚復有獻天下譬之人身也人主元首也大臣股肱也諫官耳目也京師腹心也藩省軀幹也大臣不職則股肱痿痺矣諫官緘默則耳目塗塞矣京師不戢則腹心疢疾矣藩省荒歉則軀幹削弱矣人而至于腹心受病軀幹削弱耳目塗塞手足痿痺元首豈得安然而已哉伏願皇上聽言必行事天以實疎斥羣小親禮賢臣資政治之得失究前代之興亡以聖賢之經代方書以文學之臣代方士則必有異聞足以廣聖學有讜論足以究天變而手足捷利耳目聰明腹心泰安軀幹強健元首于是乎亦大明矣斯世斯民有不治且幸乎臣愚昧

東坡集 卷一
罔知顧忌干冒威嚴不勝悚悸

退小人以安天下封事

臣聞天下之事衆君子成之而不足一小人壞之而有餘夫以一小人尚足以壞天下之事况彼此附依聲勢相倚又非一人乎臣謹按太監蕭敬蔣琮本皆刑餘小人俘囚殘孽粗識詩書遂滋姦僞能壞大事無如此徒蕭敬誤用于先朝尋遭彈劾未幾謀復于司禮竊弄威權幾壞朝政海內寒心尚賴陛下覺其姦邪亟賜屏除中外人心翕然稱快但自去年以來仍復柄用不知過情之譽發于何人而言官封章未賜省覽言之愈切任之愈專其蔣琮者初以慧黠得侍掖庭頓爾生姦自取棄外後復夤緣內倖得以守備南都恃其小才動輒妄作人非巷伯之賢諫竊執藝之說因而得計遂害善良姦狀屢經論劾聖意堅執不回不究蔣琮反罪言者夫蕭敬所掌者朝廷箋奏之文蔣琮所居者祖宗根本之地一盤據於內以專生殺予奪之權一依憑於外以快恩讐報復之欲是王氏三窟有其二矣天下事豈難壞哉且自古誤國之臣多矣其間或有顧其身家念其妻子至沒齒不敢爲惡者獨宦官者身罹薰腐性異士夫室無妻孥之可樂故利勢以自娛後無子孫之可懷故敢爲而無忌然猶幸其不事詩書罔資奸僞徒

知貪欲而不知害忠良徒知怙恩而不知竊權柄使或小
識之無粗知章句則必至於升國監而講易豈復有能下
蠶室而述史者乎蕭敬蔣琮殆近之矣釋今不治後將噬
臍臣恐天下之事不足二人壞也伏願皇上以天下爲念
以小人爲防不惑羣議斷以宸衷將蕭敬退還裕陵司香
蔣琮取回海子管事戒其勿與士夫爲仇勿再夤緣用事
不惟陛下于宦官能盡保全之道而蕭敬蔣琮亦得永保
其首領于將來矣臣意切直干冒天威罪當萬死雖就礎
鎖所不敢辭臣不勝拳拳爲國之至

糾劾宦官尚銘封事

臣聞義莫大於忠君而欺君者義不可容法莫重於治姦
而黨姦者法難輕貸此大易所以預履霜之戒春秋所以
謹正月之書切照太監尚銘沐聖朝之殊恩受機密之重
託正宜夙夜匪懈始終不渝而意驕志遂心險貌恭作福
作威無事生事竊朝廷予奪之柄負皇上簡任之明置東
廠所以防奸邪而反引誘奸邪設官校所以察貪惡而反
黨比貪惡勘事巡按之官回而預索揭帖傳報聲息之使
至而先漏邊情來朝之藩臬守令率有苞苴在邊之文武
臣工巧索饋送私門大啓賄賂公行迎合者大惡亦容鯁
直者小事必舉縱官校以羅織平人因私忿而誣害良善

人心日懼氣焰日隆于進者跪拜其門有罪者納賄其室
陞官加秩不知所由赦罪宥愆不顧於法巧偽相扇奔競
成風王化以漓士俗日薄邇者地道之變未必不由於此
也茲荷皇上明見萬里洞燭羣情已將尚銘摘發其惡籍
沒其家資財積如高山罪僇數於擢髮人神胥悅中外快
心夫受賂者既有跡而納賂豈無其人若不逐一查究痛
加懲治則奸邪得以僥倖正直無以自明如蒙伏望皇上
去邪勿疑充類盡義將尚銘拿到之日鞫問追究納賂者
何人夤緣者何事通行拿問明正典刑使姦惡有所懲良
善知所勉士風可淳地變可消而太平可致矣臣待罪言
官不敢緘默

糾劾宦官黨惡封事

臣頃言太監李榮等黨附尚銘乞賜斥逐荷蒙皇上曲加
聽從別爲處置雖未卽赫示顯誅諒亦不復顯用矣古帝
王納諫如流何以過此臣又聞尚銘昔在東廠弄權臣工
率傍門求幸名節盡隳苞苴爲計自謂手炙而可熱不思
膝屈而難伸以致尚銘貨積如山富堪敵國未必不由各
官趨諂以長其奸附益以速其禍也今尚銘已加嚴譴各
官乃爾優容是無事時則搖尾之狗乞憐有事則吞舟之
魚見漏正直解體儉邪肆姦臣竊恐百職效尤有傷治體

東日集 卷一 九
四方傳笑有累聖朝若不痛加懲治何以警戒將來是以
臣昧死再言不能自已如蒙伏望皇上乾剛獨斷離照旁
加或鞫問其親信或追究其簿書要見納賂者何人夤緣
者何事通行拿問明正典刑庶使黨惡者有所懲而受賕
者不偏罪矣

陳言消變封事

邇者天時亢旱憂及齊民皇上側身修行不遑寧處既又
降敕求言冀回天變此與成湯六事自責者異世同符其
視漢武帝乾封之說不可同日而語矣臣雖愚昧莊誦聖
言不勝感激謹陳鄙見仰答天休倘蒙采納感幸何如臣
聞之書曰人惟求舊蓋舊人者老成持重慮遠憂深其于
國家之事閱歷已多諳練已熟是惟無用用卽奏功如老
吏按獄曲直莫能遁其情老將提兵勝負莫能逃其算觀
于唐肅宗起用郭子儀以靖至德之難宋哲宗起用司馬
光以成元祐之治可見矣臣切見太子太傅兼吏部尚書
尹旻爲人威重才識變通典選精明持身廉慎跡其在任
幾四十年自始至終畧無過舉求之古人蓋有裴楷之清
通而又兼裴行儉之藻識因其子尹龍註誤遂至罷官朝
野至今惜之臣以爲古人父之惡尚不能廢其子之善然
其子之惡又豈能廢其父之善哉况其人年力未衰康強

如故苟蒙錄用未必無補伏望皇上軫念舊臣自今以後
端揆有缺起而用之俾得自新以圖報稱則登明選公衆
正相慶陰消陽長和氣可召亦消變之一端也又切見前
太子太保兵部尚書兼都察院左都御史王越一代奇才
干城可寄求之目前誠不易得况其人經事累朝多歷年
所積有勤勞方陞前職使其能自慎重以保功名則雖與
唐之李藥師宋之范希文較功爭能亦可伯仲奈自威寧
海子用兵以後驟陞伯爵致招物議頓爾除名今茲尚存
亦未衰老臣以爲古人功過不相掩今豈可使其人獨受
夫過誤之罪而更不議其往昔之功乎伏望皇上軫念舊
臣憫其犬馬之勞不棄帷蓋之弊革其後項所得武職伯
爵可也其前項所有文職官銜乃其跋歷中外得自朝廷
陟明旌淑之典者特賜光復俾得徜徉林下以終餘年如
其可用簡在帝心則賞罰昭明功過不掩臣下知勸百工
允釐亦消變之一端也臣見同坐井罪犯言高謬陳求舊
之偏辭少助弭災之至計臣不勝戰慄待罪之至

陳言封事

臣聞天下之治忽其幾甚微而其發甚大其壞于小人也
常易而集于君子也常難故陳蕃諸賢不能重扶漢鼎而
林甫獨相乃至卒亂唐室司馬光范鎮諸君子遇神宗勵

精圖治羣起輔之尚多扞格一王安石壞之卒釀靖康之禍正邪進退之際天下安危之幾也可畏哉恭惟陛下嗣位以來黜左道用正人開言路塞倖門其于君子小人之進退謹矣然君子雖進未必無遺珠之恨小人雖退未必無滋蔓之虞臣請爲陛下試言之願陛下察臣愚悃而試聽之然後抵臣于罪據法而論之臣罪不敢辭死且不朽臣自爲諸生時聞朝臣有所謂王竑者忠貞公亮勇烈抗直在正統末乘輿播遷旣嘗廷擊大憝在成化初羣閹竊柄又嘗力辭要津求之古人可謂有汲長孺之戇而兼申屠蟠之見幾者矣臣以爲陛下求舊人輔新政宜莫先於竑者今乃遲之數月言以累人卒未起用其故何與意者同列忌其賢而不欲其同升耶或近倖銜其怨而不爲之延譽耶抑陛下去竑之日久尚未知其人而漸忘之耶不然何當用而不亟用也他如尚書尹旻居官清謹而選事亦頗練達大學士劉翊才識明敏而爲人亦頗剴直然自昔至今皆爲權姦所忌構以他事中以危言諷臺諫使攻其去假詔旨以杜其來使之賫志林泉終身不白陛下豈宜槩棄而不一軫念錄用乎夫耳目所擊者類尚如此則聞見未逮者又復幾何臣所謂遺珠之恨以此臣筮仕來遭際聖明內除讒宦外屏姦臣天討允愜于輿論而憲綱

尚漏于吞舟如兵部尚書某者鼯鼠其技虎狼其心昔守
西安括取民財厚遺朝使沽其延譽享之終身次撫延綏
則邊墻之修不減于蒙恬長城之過慘及總制三邊則墩
臺之築何異王欽若閉門之可羞方且恬不知恥斥去復
來臣以爲陛下初政所宜退莫有先於此者今乃遲疑濡
滯竝乎有聞而卒未聞也豈在廷之羣臣皆不逮其才與
或在野之士不復有其人與抑其人奸邪如杞譽言如阿
而陛下卒難知與不然何當去而不亟去也其他如大學
士某之姦邪某之貪濫都御史某之老懦尚書某之剛復
已遭斥矣不尚有其黨與乎今朝列之中由臺省以及監
院自卽署以沂大僚雖皆先帝舊臣尚多姦邪餘孽暫能
革面終不革心似此庸陋何益于國然又首惡者具招在
官言事者屢陳于疏陛下何乃愛惜之甚而不忍斥去乎
夫稂莠不除終能害穀死灰復熾猶可燎原臣所謂滋蔓
之虞者以此伏願陛下斷自宸衷毋搖羣議任賢勿貳去
邪勿疑將王竑等起而用之則君子畢集可以共成天下
之事將某某等屏而勿庸則小人退聽無復更敗天下
之事矣若再因循不決下之該部則嫉賢妬能者必多辭
抑沮而君子終無可進之時若再念其爲先朝舊臣姑留
辦事則包羞忍恥者必伺時竊發而小人終無可退之理

東坡集 卷一
故臣嘗考於遠古元凱登庸則君子彙進而野無遺賢四
凶誅殛則小人盡去而朝無倖位所以堯舜之德蕩無能
名唐虞之治卓不可及假使當時元凱有一之或遺四凶
有一之幸免雖于堯舜之德無所虧而于唐虞之治恐或
病也誠以調停之說行一薰一蕕善齊者不能同其器薰
且不勝于蕕矣朋黨之禍作一鳳衆鸚善參者無以措巧
機鳳且見忌于鸚矣不特凶邪蟠據未易剪除而俊良登
崇徒爲故事臣之愚忠實爲此懼臣不勝拳拳

代李伯起言時政

臣奉命按陝身奔走于外藩心常馳于魏闕偶有所見思
罄狂愚况懷隱憂敢辭斧鉞蓋自去年以至今日自京師
以達四方水旱相仍災異疊見言官屢遭于謫斥封章未
荷于施行衷有所激情莫能已謹陳三事少裨萬幾伏惟
俯賜省覽則愚臣幸甚天下幸甚天變可畏也人言可恤
也祖宗可法也臣惟君者天之子天者君之父父之于子
有不善懲戒之懲戒之而不改則辱身墜家聲矣惟天也
無言人君有不善假災祥以譴告之譴告之而不省則安
危及宗社矣邇來天心垂愛災變相仍固宜仰答至仁痛
爲抑畏而陛下之所以回天變者徒事虛文率臣工者竟
爲故事下詔與百官同加修省聖心無警畏之誠官僚無

貶損之節深宮之逸樂自如臺省之放恣未戢詔雖下猶不下也云修省未修省也以此欲回天意不亦難哉譬之子有不善父或怒之乃給其奴僕共加改行實未嘗改而奴僕亦因之不肯改其父之怒庸可已乎今天出災祥以告陛下陛下正當上體天心下省人事遇地震則曰地何由震將多事以累於靜耶遇日食則曰日何由食或陰盛以虧于陽耶遇彗孛則思妖不可以勝德遇水旱則思變無使於勝常他如聖學未講聖德未修初政有漸怠君子有未進進而委任或未專小人有未退退而萌蘖或尚在外戚之爵賞或驟且濫內宦之寵任或衰復盛詳以思維而痛爲刮去庶幾天意可回人心允愜陛下或謂不然曲聽左右之言仍踵宿昔之弊或推咎于臣下或有事于禱禳臣見去道愈遠回天愈難矣且左右附會者必曰天道茫昧災異之來非爲一人今與百官同加修省足矣是特以分陛下之憂心耳殊不知憂心緩則怠心生又必曰修省回天其說迂濶彼佛力道術或可救厭于是禱禳之事興矣是特以紓陛下之懼心耳殊不知懼心釋則侈心生怠心生者百善可墮侈心生者百不善可作其流弊不至于以天變爲不足畏不已也臣再思之天子之有天下猶庶人之有其家也庶人之家或鵬集于舍或犬嗥于垣或

鬼憑于人或釜鳴于竈有不招大害而致大灾者乎遭之者有不狂叫奔走悔過遷善以祈解之者乎有天下者乃反怠于善侈于不善以玩天變而不之畏是烏可哉臣愚昧無知不能推明天道遠引故實以獻陛下惟願陛下以一得之愚納臣言以庶人之家視天下則幸矣仍乞敕厲言官勿爲畏忌遇有天變務須直言陛下詳閱封章躬自省覽毋付左右以代聖裁務受盡言以旌直節其事難處分文難剖析嘗與內閣及文武大臣可否論思不宜謀及摯近以虧至治庶幾骨鯁之士敢陳而弭災之道可得蓋朝廷之設言官所以決壅蔽而廣聰明故聖王之于忠臣恒以託心腹而寄耳目陛下卽位之初深知此意固嘗坐屈羣策大開言路下僚之狂言無忌旣薄其辜而先朝以言去官特加錄用下情漸達士氣頗張馬羞立仗鳳效鳴陽行止騰謠貴戚斂手天下之人欣然相告曰不圖今日復見謗木諫鼓之風破柱埋輪之節夫何一二年間頓然中改賜還之澤未溥及于逋臣盡網之誅又駸加于正士以爲出于宸斷則于言者前何容而後何不容以爲牽于多門則于讒者後何信而前何不信是必有其故矣而臣未能得也惟陛下靜以思維反而審察忠言聽讒言拒則天下治蹇諤退萋菲進則天下危差失于一念之轉移而

究竟于萬幾之叢脞其流弊不至于以人言爲不足恤不
已也且誰無爵祿之可懷誰無身家之可顧誰不畏敲朴
之威誰不憚降謫之辱而放言取禍甘心以罹者豈有他
哉彼亦誠知受君上之深恩不敢負畏身後之譏議不少
貸耳譬之盜賊將劫主財奴聞于道有不奔告于家者乎
傭保或敗翁事子偵而知有不密言于親者乎不然則負
恩庸奴僨家敗子人孰不唾詈哉又况爲臣者未必盡才
而才者亦多未肯以自盡賞之使言猶有懷爵祿顧身家
不肯盡于言者而况敲朴降謫使人懷疑貳凜畏懼遁效
循默乎臣恐將來有殃民之政誤國之徒亦無人肯爲陛
下言矣且今之所謂言官六科十三道耳一貳于封駁一
雜于刑名其職固已不專而其所言又或暫容倏拒陽喜
陰怒而不見信則彼亦安能盡其職業立殿陛以可否天
下事乎職不盡于下言不信于上則君子將日消小人將
日長政事將日壞禍患將日生譬有人焉自塞其耳目而
使一物無所見一步不可行乃欲出門以登高望遠其不
至傾跌狼狽者幾希乞敕吏部備查先朝及近日大小官
員以直道直言獲譴而以他事他辭去官者疏名上請降
謫者收錄之量移者超遷之投閒置散者起用之從戎除
名者別白之如此則人言以恤而下無私議矣開創之始

萬變俱當究心故祖宗之法萬世所宜遵守書示監于成
憲詩言率由舊章聖人示人斷不可誣我太祖皇帝大造
乾坤太宗皇帝再清海宇立法垂訓文謨武烈所以爲聖
子神孫慮者至深遠矣丕承于文謨敬承于禹道百世不
遷萬代如見是豈非聖子神孫之所當恪守者乎臣愚未
暇悉陳姑舉其一高皇帝起自白衣周知閭閻之事然猶
日接羣臣以論政治文皇帝起自藩國備諳上下之情然
亦日接大臣以咨謀議今上徵國典下撫羣言載于誥敕
卷書見于詩文銘誌往往見二聖之于臣下或親臨直廬
或召對便殿或燕遊許陪或應制有作藹然唐虞都俞之
風而熙然家人父子之語也臣上窺聖意不過欲通上下
之情決壅蔽之患耳蓋上下之情通則知有天變知有人
言讒諂無自而進聰明無自而昏弊端無自而生奸宄無
自而起矣壅蔽之患作則讒諂日進聰明日昏弊端日起
奸宄日生天變將不足畏人言將不足恤矣夫天變不畏
則天曷相之人言不恤則人曷戴之此固位之臣持是說
以希合而季世之君卽此道以取危亡而竟莫之悟也我
祖宗睿識遠見所以貽厥孫謀者寧有窮乎迨及宣宗皇
帝時則有大學士楊士奇尚書蹇義諸臣英宗皇帝時則
有大學士李賢尚書王翱諸臣不時進見相與講求軍民

東日集 卷一
利病可否四方奏疏以故宣德之初人樂太平天順之際
治稱明盛至今以爲美談而閭閻尚懷追慕蓋自成化以
來先帝狃于承平厭接臣下而尊卑遂至濶絕末年弊政
百孔千瘡幸而龍飛御極虎變炳文陛下以神聖之資守
祖宗之業咸有一德于茲四年大廷之朝雖無間于寒暑
便殿之名終未及于臣僚經筵僅一暴矣退而寒之者至
賢士僅一傅矣引而咻之者多如此不已安知將來不有
以深拱禁中待事之謀及勿使親近儒生之術誤陛下者
乎此臣之愚所以必欲陛下法祖宗以通上下之情也今
中外諸司皆祖宗所建以佐陛下治天下者也譬之作室
者必用匠卽鹿者必用虞舍之何以成室而得鹿哉臣伏
望陛下會朝之餘日御便殿接大臣以論思藉嘉言以啓
沃省一奏則與共論其事之可否遷一官則與公論其人
之才德行賞相與論其功能行刑相與論其情罪兵威未
振與論練兵之道民事未勤與論安民之術中外臣僚則
論其孰忠而孰佞左右近侍則論其宜親而宜疎國何如
而後安與論久安之策國何如而乃危與論持危之方于
天變則與論其致之之由與其弭之之道于人言則與論
其納之之是與其拒之之非如此則上下交而志同君臣
得而化行矣不然深居九重中決庶務親宦官宮妾之時

多接賢士大夫之時少則是手足腹心之視無夫一體之親而大廷咫尺之間如隔萬里之遙矣君有魚水之情下何由而知民有葵藿之情上何由而鑒君臣扞格情志未孚譬之人身列其夤矣豈能久存哉前代人君不與臣下相接惟秦二世與唐敬宗此豈宜爲陛下道之以辱聰聽哉往迹相觸有激于中臣之告君不敢不盡故昧死援及之耳乞敕在廷之臣許賜清閒之燕百司庶府旣奏對于奉天門而庶績萬幾仍備議于文華殿部院卽入科道隨之以準前代諫官入閣故事如此則上下之情旣通而天下之治可必矣是則爲治之道在于畏天變恤人言而畏天變恤人言又在于法祖宗接臣下惟皇上留神採納臣無任惓惓

代李伯起陳便宜六事

臣按陝將滿問民疾苦察吏貪污仰體聖仁下革姦弊不敢少有遺力孤陛下任使之心然目擊耳聞尚有憧憧于懷而未能自己者亦皆軍國重務關係匪輕開具于後上塵聖覽倘賜采納施行地方幸甚生民幸甚臣不勝拳拳愛國之至一沿邊糧草所以助軍興增敵愾者也姦弊苟不能除則邊儲何由得實臣切見榆林寧夏各營堡糧草多者僅數萬石少者纔數千石承平坐食或僅足以支給

有警調發將必至于匱竭豈不悞事揆厥所原積非一日蓋大利獨擅于權豪故弊端積生于出納今各營糧料乾潔草束新鮮者皆出自地畝州縣之賦稅也糧或粗粃澁爛草或斤數短少皆出自銀買權要之中納也惟賦稅故精美惟中納故濫惡且其上納之時遇賦稅則納者無勢力可恃收者無關節以通曬晾必足篩簸必勻席藉必厚斛面必多以故軍士關支多得實用銀買中納者非炙手可熱之赫威則薰天可畏之勢燄要其所納者米攪粃糠草覩沓腐或扣除在厥月糧而以陳作新或賤買在場舊草而指垛作數視軍職如牙僧役軍士爲脚夫鞭驅入倉麾使上垛官攢敢怒而不敢言斗秤知禍而不知避故糧遇盤則折草遇查則陪軍士不獲實用邊餉徒事虛文而射利之徒乃得便計至有車載寶鏹山積淮鹽豈不真可惜哉及其放支之時通同無籍軍職將逃故軍人一槩冒支月糧倒死馬匹一槩冒支草料遇折布則扣除折布遇折銀則侵欺折銀修邊者有口糧墻雖修而軍未嘗關口糧出哨者有烘炒境雖出而軍未嘗得烘炒是邊儲大利半歸權要之手半入軍職之家官攢斗秤又私竊其一二其弊如此邊儲欲實豈不良難然不徒各邊爲爾至于腹裏皆然臣竊見各府州縣倉糧頃因年荒出納不一有會

經借出未還久而里甲隱瞞者有發銀糴米未完久而官吏侵尅者有災傷該免仍復全徵者有賑濟該關不依實數者每每扣入私家抽補文卷以致存留倉糧虧折則預備以充數預備倉糧欠缺則指存留以取盈又因科道官員不來查盤守巡等官苟應故事故其倉廩率多虛名其或有糧又不如法非攙和沙土則拌勻粗糲倉廩或不蔽風雨出納或不嚴封鎖以致浥爛竊偷又復過半其弊如此不減在邊陝西地方北鄰強敵西接諸藩中國邊患三分居二而各邊倉場及州縣儲庠乃至如此一遇兵荒可爲寒心如蒙乞敕該部會同都察院計議添差御史一員糾察糧弊兼理清軍蓋有軍必有糧有堡必有倉故令兼理庶獲叅知每遇三年差官盤糧之時不必再差御史止差給事中一員會同查盤仍照巡按事例一年更替則姦弊可除而邊儲充斥矣一各邊軍馬所以防外侮衛封疆然因循日久弊端尤多臣切見各邊軍馬大槩有名無實逃亡歲久者有司不行解補見在精壯者軍職又行賣放所餘之數十纔五六除榆林寧夏在城軍馬外每一營堡所有馬步官軍多者千餘少者數百夫男出塞則婦女應門戶精壯征進則老弱守城池又其一歲之中正差則出哨燒荒相爲禪代雜差則擡扛造工無有已時私差則

又爲其把總等官採辦芻蕘耕種田地包納月錢催放私債甚至太監總兵亦復如是爲邊軍者苦可勝言然不獨邊軍爲爾至于西安三衛所以分番禦邊者亦不能免此弊每每精壯跟官老弱操備以致馬無騰駕之材人乏控弦之士敗鼓折旗軍威不振缺戕枉矢器械不精紀律全無刑憲輕犯故其軍士私鬪則勇公戰則怯爲賊則易殺敵則難夫邊軍卒歲其罷弊旣如彼班軍備冬其罷弊又如此設有疆場之事豈不大可寒心如蒙乞敕該部會同都察院計議如臣前項所請添差老成剛正御史一員專理軍糧之事仍將遠年及近日軍政條例斟酌去取編集成冊以爲法程其間軍衛有司但有事干軍馬錢糧應提問者就行提問應叅奏者事發先革管事依律請旨提問庶不長姦縱惡有悞軍國大計也一流民貧苦本可矜憐然久聚變生或釀大禍預防之計貴于先幾滋蔓之勢不可浸長臣切見陝西漢中地方北枕終南山山厚七八百里草木茂密巖壑迴深蓋人跡罕至寇賊淵藪也東接襄鄖南連夔蜀山多地僻水險林深中間仍多平曠田地可屋可田以故寇賊生發每在此中自國初迄今凡幾作矣釋今不圖後患未已兵法有云強弩末勢不穿魯縞今漢中居陝西之末勢平時則政令不易及有事則軍馬卒難

到吾既有可乘彼又有可恃則其易聚理亦宜然猶河南之南陽湖廣之襄鄖四川之夔州保寧皆末勢也所以羣盜前後倡亂不一大者拒敵官軍如劉千金和尚至虜王師而後誅小者刦掠百姓如野王綱宿端公至動民兵而方剿費損糧餉屠戮生靈不知紀極雖用事者建白已于鄖陽添差巡撫都御史漢中夔州襄陽等處各添設撫民副使等官官愈繁而政愈紊卒未見有能散遣流民以安戢地方者也蓋吾之設官雖多而政出于三彼之末勢如故而心合于一一則專三則雜專則簡雜則繁聞專可以破雜矣未聞雜破專也聞簡可以御繁矣未聞繁御簡也臣非的有所見豈敢妄言如蒙乞敕該部會官計議將陝西漢中地方湖廣襄陽鄖陽地方四川夔州保寧地方割爲一省其布政司則布政叅政叅議止各設一員按察司則按察使副使僉事亦止各設一員都司量設都指揮一二員以相維持將前撫民等官一切省去則是添設之官適足以當省去之數至於巡撫等官仍舊不動每年纔添差一巡按御史耳如此則其地方之延袤足抵山西官員之裁省畧當貴州不惟摧奸宄可恃之勢抑且爲地方經久之圖矣一風俗之美惡關政治之得失臣切見陝西地方中外接壤土附雜居有司之教化不明小民之污染

殊甚雖沾沐聖化漸爾革心而帷薄惡風猶安故態典雇妻孥不知廉恥奸淫男婦罔畏刑誅有一妻而三四其夫告爭不已一父而五七其婦聚麀以奸妻典與人已生子女而告欲贖還子雖娶婦猶未成婚而先遭父辱兄亡占嫂爲妻父沒母嫁與人閨闈之醜莫甚于斯不立法以痛懲將有傷乎國體天下之治以綱常存焉耳陝民之綱常若此豈細故哉臣嘗求其所由闖闈之近土附雜居習染之風婚嫁太早故也古者男子三十而娶女子二十而嫁則是男長于女明矣今陝民男方孩提卽娶壯女女堪生育纔配幼男往往行于路途人疑母子鞠于家室罔類夫妻男女婚姻不時不倫至于如此如古禮何故其始妻嫌夫小及其終也夫惡妻衰兩情不諧百醜遂出爲之親者其初本欲早得健婦其卒乃至自爲姦夫絕滅天常敗壞倫理尚忍言哉如蒙乞敕該部會官計議將陝西居民通行禁約婚姻不許太早俱要年貌相當年十五以上方許議親二十以上方聽成配若有故違女年但長三歲者俱問以罪許其首官改嫁不追財禮如此則婚姻以時而姦慝不作矣一權茶以足稅市馬以充邊前代實中國敵遠方之至計也臣切見漢中一府係產茶之地洮河一帶係市馬之途然則二事勢常相須故茶法嚴則市馬有資馬

政修則權茶有效今茶法之嚴自入潼關俱爲米飲所至
市貨絕無茶斤懲羹吹虀遠嫌避誣亦有不得不然者然
而茶之姦弊雖除革多方而畜馬政務則廢缺如故今甘
涼等處爲行太僕寺者二爲苑馬寺者一又有監有苑立
法頗詳近年官不得人邊常缺馬非因水草不調以致倒
死則因羣蓋失時以致歇駒非撒放不收盜因攘取則抵
換得慣羣無留良夫茶而謂之權已與小民較緇銖之利
馬而謂之市又與遠人爲市道之交是豈得已爲之然使
果獲實用則亦不恤小嫌今乃取之盡緇銖用之如泥沙
豈不真可惜哉臣嘗備求其故蓋因茶馬之官岐而爲二
而政務之歸未合于一亦勢則然也今巡茶御史惟知以
茶易馬而馬之消長所不省也寺監等官但知得馬于茶
而茶之利害所不聞也是生財者不獲用財者之柄居室
者不諳作室者之艱則夫馬政不修豈不亦有由哉如蒙
乞敕該部會同都察院計議合無今後陝西行太僕寺及
苑馬寺茶馬并孳生馬匹俱聽巡茶御史點閱驗看臚息
比較孳生禁革姦弊如此則茶馬之政旣得合而爲一茶
馬之官又不岐而爲二則馬政益修而茶法得利矣一常
材不可以供重職重地不可以任匪人此士夫談治之定
論古今爲治之定法也臣切照陝西地方一藩六道八郡

三邊北接強敵西鄰諸塞錢穀甲兵雄于天下矧其形勢
之勝左據穀函右連隴蜀終南漢水限其前紫塞黃河繞
其後沃名陸海要築金城自古以來非建大都必爲名鎮
承平則戍守惟謹有事則英雄必爭較之他藩可謂重矣
委用混及于常材則顛債終至于敗事如太監所以奉宣
皇猷鎮守境土總兵所以調度軍馬汛掃邊塵都御史所
以撫安黎元振肅風紀監察御史所以糾正百度激揚羣
僚以至都布按三司之彼此相維府州縣等官之上下相
統皆所以爲重地設也匪擇重人以膺重務無事之際猶
或可以濫竽變故卒逢將遂至于覆餗昔蕭何知爲重地
故欲漕關中項羽不知爲重地故拒韓生勸都關中之計
符堅任王猛則秦中治劉裕任義真則秦中失是豈非重
地重人之明效大驗歟如蒙乞敕該部計議今後陝西地
方鎮巡等官務責素負威名通達國體平居有虎豹在山
之勢臨事無駑馬戀棧之羞者充之其鎮守必求如太監
歐賢總兵必如都督許寧巡撫必如都御史耿九疇馬文
升監察御史必如甘澤以至藩臬守令皆務擇人不輕委
用如此則人地兩重政治聿興臣所謂查糧草清軍馬處
流民正風俗謹茶馬之數事可以不勞而舉矣

乞休疏

臣中錫先任刑科給事中始以論諫上忤先帝再榜于朝
調攝失宜兩股俱痿步履艱辛陰雨疾痛雖加醫療終未
奏功繼因天變臣復論列又忤近倖權姦日進讒言備見
擯擠臣寧不知言出禍隨事修謗興而觸目激衷忘身報
國自臣子之當然而亦至情之不容已也尚賴先帝日月
之明竟追雷霆之罰適會以九年奏績陞雲南按察司僉
事陽雖遠斥以荅羣猜陰實薄陞以扶公道是蓋先帝之
殊恩微臣之過幸萬死不足以報彼時未及卽任忽罹父
喪苦塊之次悲懼交并寒煖失節前病轉痼自分支離不
可復用不意起復之日恭遇皇上嗣登大寶一德格天百
度更化天下竚望太平如渴如饑顧臣何人敢忘于半生
之作養而永棄于萬世之遭際乎黽勉赴部再授今職初
監邊儲今督學政比來關陝首尾二年間關鞍馬跋涉山
川具歷嶮巖不勝勞勩雖力疾以圖報終無益而瘵官竊
念臣自筮仕迄今一十有六年矣官居方面不爲不榮但
臣筋力早衰鬚髮易白韓齒旣搖沈軀復瘠重以前病日
劇漸不可支古人所謂七不堪而三宜休者兼有之矣使
不自陳退休誠恐置身罪戾鐘鳴漏盡之譏固非爲臣子
者之所宜言而老馬爲駒之責亦膺重任者不可不加之
意也伏乞聖慈俯垂憫念積薪之歎敢伸喙于清時採薪

東日集 卷一 三
之憂嘗恨垂于素志倘得苟延殘喘安享太平了蟪蛄之
春秋竟蜉蝣之朝夕則臣雖去任之日猶在官之年也臣
無任戰栗待罪之至

起大臣以禪治道封事

臣聞今之吏部尚書古冢宰官也古之冢宰統百官均四
海今之吏部進退臣工參決大獄大疑亦古冢宰也其予
奪榮辱固簡在于聖心而汲引明揚則惟屬之吏部吏部
尚書得人則善類拔茅連茹庶政以清而天下被其福不
得人則陰邪蟠根糾結庶政以隳而天下被其禍是用一
人之得失而億萬人之苦樂安危繫焉可不慎哉茲耿裕

病故吏部尚書久缺員我皇上甚重其選其難其慎蓋嘗
當饋而起撫髀而歎思得賢哲以副委任而卒未得也兼
以近年以來仕途雜沓選籍猥冗才者未必見用而用者
未必皆才罪者未必盡黜而黜者未必當罪百僚曠官庶
政隳墜水旱不時災異疊見良由于此臣久知其故未敢
遽陳今逢其會豈容緘默俯罄一得之愚上塵九重之聽
然在廷大臣嫌于上言德政不敢陳述而在野遺賢率多
此短彼長不能盡悉訪得致仕尚書尹旻兩朝老臣一時
人望在朝著三十餘年士林倚重任銓衡一十八載公論
攸歸幽隱莫逃其精明天下想望其風采矧其節操如故

精力未衰屢經薦剡久負盛名倘安車一起于耄良將故
轍改觀于俄頃山濤之啓事陳羣之中正不得專美於前
朝而裴度身繫安危文彥博平章重事將益隆于衰暮伏
望皇上鑒觀前代斷自宸衷用一人而千萬人悅則選籍
清而職度敘人材興而庶政理矣如尹旻或有瘵曠尸位
之辜臣甘受疎狂妄言之罪

乞恩養病疏

臣自弘治九年六月十三日奉敕前來宣府巡撫地方先
是臣有腰膂之疾已數年矣遇寒輒發痛不可忍黽勉來
邊又涉四載爰自去冬以來邊地苦寒復感脚氣併與前
疾上下相連交疼互痛晝夜呻吟坐臥困苦殆成痼疾屢
行醫療未痊計非旦夕能愈文移壅滯邊務廢弛曠職瘵
官負譏罹罪况臣今年五十有四歲矣稟賦素弱精慮早
衰氣息奄奄顛毛種種所可憂者不特前疾而已本鎮地
方朝廷北門京師右臂東方之寇鈔無已北敵之臣叛不
常巡撫官員政繁責重委諸精敏之才尚未保其必濟乃
畀衰遲之士重以病體支離誤事將來不言可喻如蒙伏
望皇上體天地之心憫螻蟻之命將臣放歸田里自行請
醫調治乞敕該部別選賢能以充巡撫庶幾邊事不誤而
臣之餘生亦可保矣臣不勝感戴天恩之至

東日集 卷一
辭遼東巡撫疏

奏爲辭免職任事弘治十八年十二月三十日節該奉聖旨是馬中錫着巡撫遼東地方贊理軍務起臣于閑廢之中假臣以撫巡之任涓埃未報嘗誓竭于平生天地包荒固不遺于遐遠敢因報賜附進瞽言臣于先帝之朝謬與中丞之列邊陲多事爰命臣以撫巡戎務一方曾備員于宣府嬰疾誤事具奏謝歸經今八年未收一效兼以年踰六旬氣餘毛髮不惟有誤邊方戎馬之事抑且仰孤皇上委任之心如蒙軫念下情收回成命別選賢能以充任使容臣養疴田里待盡餘年不勝感戴

抵遼東謝疏

奏爲謝恩事仰荷聖明不棄衰朽假以中丞舊職畀以東遼地方累疏固辭未蒙賜允竊念臣衰朽無能幸沾新化疎庸多病賜告先朝方畢志負桑榆之暄遠蒙恩采薑桂之辣疏辭徒切簡命益堅昔未勒燕然之功臣嘗抱歉今重膺遼海之命臣敢固違况恩旨旣勉以赴官而部使又促其就道病駒甫起卽出廐以前驅倦鳥忘傷遂辭林而東徒顧惟龍章之寵節鉞是專愧乏兔且之才干城曷任尚賴乾剛獨斷姦宄懾心聖武漸昭官軍戮力臣撫巡邊境將吐茹之畢行贊理戎機或安攘之少效臣無任云云

東田集 卷一
辭兵部侍郎疏

奏爲辭免職任事近得吏部公移取臣赴闕俾謝撫巡之任入佐兵馬之機仰荷皇恩俛焉自省聖心簡在雖萬死其何辭省已知愆諒寸衷之有在本兵重任佐理須仗于賢才而臣謬識迂疎衰病奚堪于徃使伏念臣早年備位曾效微勞以病來歸杜門却軌久請藥裹抱疾疢于山中忽捧璽書俾撫巡于遼左德音鄭重罔敢稽留只得力疾兼程抵邊視事苟延三月莫展一籌願殘齒旣衰臨事多疑而少斷沈疴未愈馭軍有弛而無張方擬固辭又叨今命官居兩鎮常懷搏虎之慚秩亞六卿敢負續貂之誚謹陳愚悃伏乞聖裁或姑輟新陞仍令巡撫或并奪舊任遂俾退休則臣庶幾免尸素之愆于立朝而獲支離之幸于卒歲矣

辭陞陟右都御史疏

臣本菲才誤蒙簡用去年九月起臣于閑廢之中許國孤忠得布于撫巡之任素餐有罪悚怖奚勝仰負九天曾無寸補方欲投劾以引咎忽沐恩旨以超遷異命重申崇階二品控辭無地昭鑒有天伏念臣臺憲濫叨未揚風紀邊方巡撫罔效安攘房瑄徒負于虛名師丹旣老而忘事茲者皇上因東方之多盜命上將以出師謂臣久處塞垣或

東日集 卷一
諸軍旅假臣提督重柄竚俟功勛揣分非宜受恩過望伏乞聖明量臣才德勿陟崇班照臣年勞俾仍舊職亟寢臺端之命姑分闡外之權臣敢不罄竭鄙才用效朝歌之利器奉宣德意勉圖渤海之賣刀臣臨楮無任悚息奏奉聖旨卿才識宏遠累任邊方諳練戎務比因出師剿捕盜賊特委提督重任宜勉副朕意不允所辭吏部知道欽此

辭左都御史疏

近者左都御史缺員仰厯聖心載頒恩命務須得人以振風紀廷臣會議各秉公忠詎意愚臣乃辱薦剡奉聖旨馬中錫陞左都御史待賊情寧日回院掌印管事竊念臣年迫桑榆才同樗櫟驅兵殄寇素無借前箸之遠圖貞度蕭僚詎宜虛左席以久待况趙堯偶以缺人得印分非所宜而周顛欲以擒賊繫金言之可愧如蒙伏望皇上亟收前命俯順下情仍臣舊銜勉圖新效庶濫竽追悖齊之譴而負乘無致寇之譏也臣無任激切感恩之至

謝恩疏

臣先嘗具疏奏乞辭免左都御史新命仍以舊官勉圖後報未蒙聖心俞允復荷溫旨慰留卿學行老成譽望素著特此簡命宜盡心督捕盜賊事寧之日照前旨回京供職不允所辭臣聞命驚惶莫知所措伏念臣才本庸愚年仍

東日集 卷一
衰老濫陞臺長雖抗疏而莫辭昇掌印章恐視篆而增愧
况臣適當討賊之任尚滯還朝之期亟飭于六月之戎車
遙望于五雲之縹緲情深北闕稽首徒至于再三寵冠西
臺報德未圖于萬一臣何勝惓惓

鳴冤疏

見監左都御史臣馬中錫奏爲乞恩辯明誣枉等事近該
御史吳堂劾奏廷臣會議情由謂臣久駐山東擁兵不進
名曰提督軍務其實自保身家節該法司將臣提問伏念
臣師出無功罪當萬死尚復何言但委曲衷情冤苦始末
一息尚存猶有未能終默默者敢昧死爲聖明披陳死且
不朽臣自正德六年四月十二日離京至本年八月十四
日取回涖任四月有餘親歷四十州縣前後斬獲首級一
千五百名顆所過城邑俱有符檄公移而所獲功次亦嘗
仰沐恩獎使臣果如御史之言廷臣之議擁兵不進自保
身家則前項功績奚從而得九重恩命豈容以幸致哉臣
不敢一一敷陳仰塵睿覽如蒙暫寬斧鉞之誅少緩須臾
之命將臣禁錮詔獄擇遣刑官備歷臣經歷地方及與賊
對敵所在要見臣某月某日在某處振旅以凱旋某年某
月某日在某地刑誅於逗撓某地鏖戰互有瘡傷某日追
奔致賊走死某日曾懲宋振之無功某日曾責馮安之退

怯備陳具奏參考臣言若有一言不實虛張功次粉蓋臣
軀亦無所怨且臣自幼讀書寧不知事君致身死忠全節
夫身且不惜死亦不顧家計何爲而忍負吾君委負之重
切切以自保哉但臣所領達兵止八百餘人而賊徒衆且
數萬總兵官張偉所領京軍僅千人又多膏梁子弟不但
強弱不敵亦且衆寡不侔以故動卽窒礙卒難成功且僨
事之罪小蒙蔽之罪大臣仗天威窮追逐賊見勢漸憑陵
恐終難免屢屢哀鳴欲首罪自新以求生路臣豈敢蒙蔽
不一敷陳以罹重罪乎臣子職分惟當備細上陳伏聽聖
明裁處耳故臣疏內有言合無容其自新赦罪歸農惟復
照舊進兵剿殺而行移各境州縣亦有若彼敢再放火殺
人照舊剿殺之語則臣之不才豈輕信其誑誘者哉夫御
史言官也廷議國論也彼有論列臣豈敢浚辯但其言亦
有自相牴牾不容以無言者且旣曰信賊誑惑則臣無疑
賊之心矣旣不疑賊何用擁兵以自衛旣曰擁兵不進賊
當感臣活命之恩終無害臣之意矣臣又何用自保身家
臣旣自保身家是猶忌賊之襲臣也何以爲信賊誑惑只
此數言漫無倫序他可知矣且廷臣與御史於臣非有私
憾必欲陷臣於死地也亦非罔以事理所無以肆強辯也
言之發也有由而事之端有據臣之始計謂山東德州爲

水陸要衝各省之文移遞送臣等之符檄征索四通八達
道里適均四環有警易以策應而避地士夫逃難賓旅多
轟聚其間朝暮噪呼千百橫議不審虛實不量強弱輒欲
斬敵人於旦夕霽妖氛於咫尺喋血近郊一刻千骸此固
臣等專闕外者之事顧彼數十萬之死命劇賊豈臣等千
八百之執綺一蹴可盡殲哉稍有異同卽是非蠶起此倡
彼和浸潤膚愬往往殺亂惑聰吠聲疑盜傳謗京師牢不
可破臣雖百喙何以自明伏望皇上軫窮獸之疾呼憐秋
蟲之哀訴除遣官親詣各該地方查訪外再敕法司弔臣
前後遣兵牌卷及各該有司應付官軍底關糧冊到官通
查明白與臣辯理便見臣有無擁兵不進自保身家及曾
否信賊誑誘屢失事機實情夫銜恨飛霜抱冤致旱臣今
日實類于是瞻望天閭何啻萬里臣不勝痛苦戀慕之至

Blank manuscript page with vertical ruling lines.

Handwritten signature or mark in the bottom left corner of the left page.

